



AVISU PÙBLICU

BÀLIDU COMENTI A PRUS DE UNU COMUNICAU DE INGHITZU DE PROCEDIMентU
(Cunforma a sa L. n. 241/1990 art. 8 co. 3 e mm.ii. afatantis)

**A TOTU IS ASSINNATÀRIUS DE POSTÈGIUS IN CUNCESSIONI
PO S'ESERCÌTZIU DE SU CUMMÈRCIU IN ÀREA PÙBLICA
DE SU COMUNI DE ARISTANIS**

Ogetu: comunicau de inghitzu procedimentu po annoai is cuncessionis po su cummèrciu in àrea pùblica e sa bèndida dereta de produsus agrìculus (mercaus, fieras e postègius a solus), po atividadis de artìsania, po donai cosa de papai e bufai e po sa bèndida de s'imprenta (atìvidadi de chioscu) cun scadèntzia a su 31/12/2020.

POSTU IN ANTIS ca su D.L n. 34/2020 cunvertiu in Lei n.77/2020 in s'articulu 181 comma 4 bis at stabiliu ca "totu is cuncessionis de postègiu po fai cummèrciu in àreas pùblicas cun scadèntzia a su 31 de su mesi de idas de su 2020, chi non ddas ant giai torradas a assinnai cunforma a s'acòrdiu fatu in sa Cunferèntzia unificada su 5 de trèulas de su 2012, _____omissis_____ funt annoadas po sa durada de dòxi annus, segundu a is linias ghia chi at bogau su Ministeru de su svilupu econòmicu e cun is maneras chi ant stabiliu is regionis aintru de su 30 de cabudanni de su 2020, cun assinnamentu a su sugetu titulari de sa sienda, siat chi dda sigat inderetura siat chi si dda apant donada in gestioni temporànea, fata chi siat sa verìfica de is arrechisius de onorabilidadi e professionalidadi chi serbint, impari a s'iscritzioni a sa camera de cummèrciu comenti a dita ativa candu non ddui at arraxonis gravis e chi si podint provai de impedimentu temporàneu in s'esercìtziu de s'atìvidadi";

CUNSIDERAU ca is cuncessionis ogetu de annoamentu funt cussas chi pertocant s'esercìtziu de su cummèrciu in àrea pùblica a tràgiu de postègiu de mercau, postègiu a solu foras de su mercau, postègiu me in is Fieras, postègiu po s'esercìtziu in àrea pùblica de atìvidadi artìsanali, po donai a papai e a bufai, po bèndida de cotidinaus e periòdicus e bèndida chi faint is produtoris agrìculus chi sa scadèntzia dda ant prorogada prus de una borta, a ùrtimu finas a su 31 de su mesi de idas de su 2020;

ARREMONAU su Decretu de su Ministeru de su Svilupu Econòmicu de su 25 de onniasantu de su 2020 chi, in s'allegau A "Linias ghia po annoai is cuncessionis in àreas pùblicas" ponit in contu me in is puntus 3 e 4 ca is Comunas aintru de su 31 de su mesi de idas de su 2020 inghitzant su procedimentu po ddas annoai, fata chi siat sa verìfica de is arrechisius chi ddui funt stabilius;

ARRECONNOTU A CRARU ca a dii de oi sa Regioni Autònoma de Sardigna non s'est ancora incurada de definiri is maneras po poni in pràtica is Linias Ghia chi at bogau su Ministeru de su Svilupu Econòmicu, comenti stabiliu in s'articulu 181 comma 4 bis de su D.L n. 34/2020 cunvertiu in Lei n.77/2020, e po tanti su procedimentu s'at a acabai in s'arrispetu de custa maneras candu ddas ant a definiri;

ARREMONAUS is artìculus 7 e 8 de sa lei 7 de austu de su 1990 n. 241, e in mesu a totu s'articulu 8 comma 3 chi ponit in contu ca "candu po su nùmeru de is destinatàrius sa comunicatzioni personali non fait a dda

fai o est gravosa, s'amministratzioni etotu s'incurat de fai sa comunicatzioni incarreledi su procedimentu cun formas de publicidadi futas chi s'amministratzioni decidit de borta in borta";

TENENDI CONTU de su nùmeru mannu de destinatàrius de custu Comunicau de inghitzu de procedimentu chi est de lei e duncas, po poni in contu un'atzioni amministrativa lestra e profetosa, bolendi incarrerai cun avisu pùblicu de publicai in s'Albu Pretòriu e in su giassu internet istituzionali;

SI COMÙNICAT

Ca est inghitzau su 31/12/2020, data de publicatzioni de custu avisu, su procedimentu po annoai is cuncessioni po su cummèrciu in àrea pùblica e po donai a papai e bufai, po s'esercitziu de atividadi artisanali, bèndida cotidianus e periòdicus, bèndita chi faint is produtoris agrìculus cun scadèntzia a su 31.12.2020 chi at lassau custu Comuni, fata chi siat sa verìfica a is titularis de is arrechisius sugetivus e ogetivus chi funt in s'allegau A "lìneas Ghia po annoai is cuncessioni in àreas pùbricas" de su decretu de su Ministeru de su Svilupu Econòmicu de su 25 de onniasantu de su 2020.

Su tèrmini de acabbu de is procedimentus po annoai is cuncessioni, sarvu suspensioni me in is bortas chi narat sa lei, ddu ant stabiliu in ses mesis movendi de sa data de publicatzioni de custu avisu. Funt fatas sarvas is datas aintru a chi fait a regularizai is positzioni aici comentì narant is lìneas ghia e in antis postu a craru.

Po incarrerai a s'annoamentu s'amministratzioni s'at a incurai de apurai:

- chi ddui funt is arrechisius moralis e, simmai, professionalis de su titulari (proprietàriu de sa sienda) de sa cuncessioni in scadèntzia;
- su stadu de impresa ativa cunforma a s'iscritzioni a s'arregistru de is impresas comentì a impresa ativa. S'annoamentu non si fait candu su titulari, mancai apat donau in pesoni sa sienda, no est iscritu in s'arregistru de is impresas o est iscritu ma comentì impresa no ativa po su cummèrciu in àreas pùbricas. Comentì si siat si sarvat s'ipòtesi ca s'inatividadi a s'esercitziu siat motivada de arraxonis gravis e chi fait a ndi donai prova. Is arraxonis de impedimentu si depint comunicai impressi a su Comuni cun decraratzioni sustitutiva e si intendint cussas chi funt in su puntu 4 de is lìneas ghia natzionalis (arresumendi):

- maladia certificada;

- ingraidèntzia e parteràgiu certificaus;

- assistèntzia a fillus cun andicap gravi comentì postu in contu in s'art. 33 de sa lei n. 104/92 e in s'art. 42 de su d.lgs. n. 151/2001;

- successioni po nexi de morti, chi megat de si fai ancora.

Candu est sotziedadi de personis is arraxonis arremonadas depint pertocai totu is sotzius. Su decraradori si assuntat de fai s'iscritzioni aintru de su tèrmini de cuìndixi diis de candu acabbat s'arraxoni de impedimentu etotu.

Candu su titulari, in passau e in totu at lassau in gestioni a àterus sa sienda intestatària de sa cuncessioni, podit provai de teni s'arrechisiu de s'iscritzioni me in is arregistrus cameralis comentì a dita ativa intregghendi istàntzia po si torrai a iscriri aintru de ses mesis de s'inghitzu de su procedimentu de annoamentu. Movendi de su 1 de trèulas de su 2021 su Comuni at a fai is verìficas chi abisòngiant in sa C.C.I.A.A. e, incapitendi iscrizioni non fata comentì a impresa ativa, non s' annoat sa cuncessioni.

In su mentris de acabbai su procedimentu is titularis de cuncessioni ogetu de annoamentu funt legitimaus a s'ghiri s'atividadi finas a su 30 de làmpadas de su 2021 o, incapitendi comunicau chi ostat a s'annoamentu, finas, simmai, a su provedimentu de arrèvoa de sa cuncessioni etotu.

Cunforma a s'art. 8 de sa Lei n. 241/1990 e mm.ii. afatantis, si fait sciri ca:

- a. s'Autoridadi de cumpetèntzia po pigai su provedimentu de annoamentu est su Comuni de Aristanis – Setori Svilupu de su Territòriu – Servìtziu AA.PP. SUAPE e Agricoltura – Bia de Ciutadella de Menorca, 19 - Tel. 0783/791356 - mail istituzionale@comune.oristano.it - PEC istituzionale@pec.comune.oristano.it;
- b. s'ogetu de su procedimentu ativau est: annoamentu cuncessioni po s'esercìtziu de cummèrciu e po donai a papai e bufai in àrea pùblica in riferimentu a s'articulu 181 co. 4 bis de su D.L n. 34/2020 cunvertiu in sa Lei n. 77/2020;
- c. sa personi responsàbili de su procedimentu est su Responsàbili de su Servizio AA.PP. Suape e Agricoltura Dot. Stefano Cadoni;
- d. su responsàbili po pigai su provedimentu de acabbu est su dirigenti de su Setori Svilupu de su Territòriu Ing. Giuseppe Pinna;
- e. po nexi de su stadu de apretu sanitàriu po su spaniai de su virus Covid-19, sa data posta in contu po pigai su provedimentu de acabbu po annoai sa cuncessioni, sarvu interruzioni de su procedimentu, est su 30.06.2021;
- f. s'Ufitziu anca fait a castiai is àutus chi pertocat su procedimentu: Ufitziu Cummèrciu de su Comuni de Aristanis, annotendi-sì in antis telefonendi a su n. 0783/791506;
- g. su titulari de su poderiu substitutivu, cunforma a s'art. 2 comma 9-bis de sa lei 241/90, est su Segretàriu Generali Dot. Luigi Mele e is arremèdius incapitendi inèrtzia de s'amministratzioni funt cussus chi narant is artt. 2 e 2-bis de sa Lei n. 241/1990.

Custu avisu si pùblicat in s'albu pretòriu, in su giassu comunali in s'arretza e si ndi at a donai connoscèntzia me in is atividadis chi pertocat.

Cunforma a su Regulamentu (UE) n. 679/2016 e a su d.lgs. n. 196/2003, su Comuni, comenti a titulari de su manìgiu de is datus chi s'ant a donai cunforma a sa procedura de custu avisu, fait sciri ca custus datus s'ant a manigiai sceti po acabbai custu procedimentu po annoai is cuncessioni pluriennalis de solu pùblicu.

Su manìgiu de is datus personalis s'at a fai cun ainas informàticas e telemàticas in modu de assegurai sa seguresa e sa riservatesa de is datus etotu.

Su Dirigenti
Dot. Ing. Giuseppe Pinna